


莆陽水利志 卷一

水道

地713.1
176.1
NW10

(13.)

4



莆田水利志

圖說

水道

陂塘

溝渠斗門涵洞附

隄防

祠祀

陂田附

章奏

公牘

傳記

雜識附

全莆水道圖說



莆田三面皆山山分三部中部自仙游縣東北興泰里石所山發脉而來過何嶺出為天壺為龜山為石室彌陀為太平山至郡治北部自廣業里仙壽峰而來分為九華紫霄尖山囊山諸山環於其左南部自仙游之洪山歷長嶺入莆界為石梯為鼓角聳起為壺公山峙其前又分為羊眠石牛三台城山天馬五侯赤崎大蚶諸山以入於海山分為三水隨山行亦分三條左自仙游之興泰里谷目火洋諸溪由九鯉湖入莆境之莒溪東行與南菽蘆溪合又合常泰里諸山之水為漁滄溪又

東行為延壽溪亦名延壽陂分流入溝溉田繞郡治之左其右則仙游縣治之仙溪合仙游諸水入莆境為瀨溪至木蘭山下橫截為陂入溝溉田環繞郡治東南循壺公山而行其大流仍由白湖入海元延祐時又於陂左近上開萬金斗門分流繞郡城與延壽水合其中平地貫以支海分為南北二洋長可四十里廣可三十里本皆沮洳惟蒲生之得延壽木蘭二水灌溉遂為桑麻沃壤又莆境東北廣業里山谷重叠其發源石竹者為湘溪下流為碧溪與鳳搏吉宦諸溪合於東鎮其下流為蘇溪其西赤溪流至赤口又其西杉溪岐山溪大松

溪三溪合流由西音至赤口與赤溪合其下流為藻湖
溪蘇溪藻湖溪至霞溪合流過馬洋合於溇溪下流為
洙溪匯為北菽蘆溪堰為太平陂亦名菽蘆陂遇支流
入圳環山溉田餘水由漏頭梧塘等處入溝與延壽水
合其大流仍入於溪至待賢里合桃源白石諸水為迎
仙溪又堰為南安陂遇支流入圳通溝溉待賢永豐望
江三里之田是名九里洋其大流仍入溪合待賓里之
蒜溪以入於海海潮入境凡四道一自黃竿而入西行
由白湖直抵木蘭陂下并入各港浦計長四十餘里水
多曲折舊號羊腸南北洋以此為界隨處隄防其一分

抵涵頭港兩岸亦設隄防一自碧頭抵迎仙港一自繫
蓼繞壺公諸山之外抵仙邑之楓亭太平港及雙溪港

木蘭陂圖說

仙游諸溪澗之水由莆入海海潮由黃竿而入溯流而上溪流為海所混鹽淡不分難資灌溉宋治平間長樂錢氏女始於樟林之將軍灘堰溪為陂開溝循鼓角山南行溪漲陂敗錢赴水死同邑進士林從世復於上杭溫泉口築陂岸高水急亦敗於潮熙寧初詔募興陂者候官李長者宏始窮溪源相地於木蘭山下為今陂其地在錢之下林之上溪廣水緩疊石為址布石柱三十二間縱橫鈎鎖陂上下數里各布長石浪不能噬幹溪流南行為大溝七小溝一百有九以分受之長四十餘

里廣十餘里創洋城林墩陳山三陡門以備宣洩先是南洋皆斥鹵之地唐觀察使裴次元始令滕海為田惟恃新塘橫塘陳塘許塘唐坑塘國清塘蓄水灌溉旱無餘潤顆粒不收至是而田無旱憂皆為上腴因填五塘為田惟留國清塘以備大旱元總管郭朶兒張仲儀復於陂左設萬金陡門開溝通流繞莆城由南而東而北與延壽水合而北洋亦被其澤矣

按木蘭陂遏溪流通渠以溉南洋水勢直下滔滔莫禦北洋特沾其餘潤耳舊制三十二陂門皆閉以木板澇則啓之大水措手不及輒至傷人陂亦易壞明

通判董彬縣丞葉叔文先後重脩始易以石按水高下為定則以松木為閘潦則水滂而過復恐水停沙滯留陂右一門遇漲啓板減流刷沙入海俗呼脫沙陡門閘夫向有租穀乏人經理數十年來雖滯不啓以致陂為沙壅溪流東奔先入北洋次入海南洋陂口為沙所遏受水既少又大溝過橫山至渠頭村壺公山寶勝溪入之溪流易長易涸每遇暴雨發漲水勢壁立盪決沙石壅溝成洲木蘭水屈曲避道而行俗所稱荷包瀨是也嘉慶十四年莆大水溪流猛急沙石冲注溝道全行壅阻高至數尺咽喉既塞水不能過又渠頭橋以下大溝二道一厯金城庵興賢橋坂頂樟橋十餘里通流要津淤淺特甚各支溝俱埋塞一厯東臯至橫塘新塘又合壺公山梁溪之水山澗裂壞沙土隨水壅入大小各溝殆成平壤又下游各溝間段淤淺五日不雨涸可立待禾苗缺水舟楫不通雨多則又漫溢田疇屢歲不登膏腴將為棄地官與民屢謀不成道光五年知府徐鑑署通判李嗣

鄴知縣王廷葵奉 宮保金匱孫公諭令勘詳 宮保首捐重金為倡議明派工募資出示曉諭六年秋候官縣知縣素鴻接署通判復奉 巡撫汾陽韓公

捐金出示分鄉脩濬是冬拆脩陂岸知縣王廷葵親
赴南洋督催分鄉脩濬其大溝緊要處所加以津貼
不如式者歸公重開並調夫開掘陂口及荷色瀨淤
塞於寶勝溪建築三石堰并將溪道闢寬逢灣取直
以殺水怒所開各溝廢沙分別挑運傾棄山澗裂壞
加以堵築自是而木蘭陂流順軌荷色瀨不復湧阻
各溝深通水早有備矣

延壽陂圖說 使華陂附

莆田常泰里莒溪受仙邑九鯉湖之水與南萩蘆溪合
又合常泰里諸山之水滙為漁滄溪其上隨溪逐節橫
截為陂過八瀨復截為使華陂其下流為延壽溪即延
壽陂也先是溪水由延壽出杜塘趨海唐建中時吳長
官興始塍海為田於杜塘築隄遏流南入沙塘坂名曰
延壽陂按陂皆壘石遏流延壽無之醜為巨溝折為股
以其渚水通溝而名以陂也溝橫經直貫渚水溉田溝凡三派南至蘆浦東南至宜
海東北至涵江統為北洋嗣因平疇食利尊賢里地高
灌溉不及於上游建立使華陂分南北二圳幹流溉之

大流仍由延壽入溝以其為使華陂下流故亦稱使華
水焉又楓溪之水由淡頭入之太平陂之水由漏頭吳
塘太平庄入之北洋受水雖多沿海築埭以漸而增延
壽溪源不及百里又自使華以上節節為陂潦有餘水
早無涓滴楓溪水源更短太平陂所遏北萩蘆支流環
山灌田不能多餘入溝元總管郭朶兒始議以南陂之
有餘濟北洋之不足與總管張仲儀相繼開萬金陵門
引木蘭水由嶼上厯杭口東埔先溉蕭厝謝厝柳橋亭
墩溝下卷諸村至城南轉城東分入各溝復於新港涵
江截海通流會延壽水及太平陂等水過涵江以溉上

下望江并通舟楫先後設蘆浦陳壩新港慈壽四陡門
宣洩入海

按延壽溪正流由七星橋直趨潭頭橋歧而為二一
由白馬廟繞拱辰門至枋尾一由三亭至烏石溝俱
與木蘭水合又支流由延壽橋下轉至企溪大洋歧
而為二一由下南溝出濠亭至四亭溝下與木蘭水
合一由陳墩大溝會楓溪之水東北行歷吳刀呂埭
至新港會太平陂之水北入涵江又過涵江溉上下
望江諸鄉其正流由七星橋歷潭頭橋直趨蘆浦者
水勢最為迅急力能挾沙由蘆浦陡門入海年代久
遠停淤湮塞下流不暢上流水高勢急侵迫橋上東
岸漫溢而過橋因以圯明萬歷間邑人給諫黃起龍
倡捐脩橋築砌八字石隄以障溪流名為八字陂雍
正十年隄決屢脩屢決潰為深淵正流改趨涵江沙
隨水行所經過之陳墩以下大溝支溝俱埋塞正流
又改由下南溝濠亭而出溝不能容輒至漫溢企溪
諸鄉一遇發漲男婦走避高處勢極危迫又木蘭陂
水由萬金陡門分流歷嶼上杭口東埔陳墩諸村至
城南歧而為三一繞城西與北磨溪合一繞城東至
枋尾一由西社至梅花亭霞墩分入各溝俱與延壽

水合萬金陡門以下水勢屈曲挾沙而行日久失脩
大小各溝淤淺埋塞道光六年南洋開溝水勢直下
北洋地高受水不及三分八九兩年俱苦旱 宮保
孫公閱兵至莆詢悉情形飭府脩濬九月間署知府
陳鳳翰署通判瑞光捐金為倡延集北洋紳士殷戶
公議樂從詳請出示曉諭知府黃綏誥到任接辦署
通判瑞光逐日親赴北洋各鄉勸募經流四大溝及
城濠俱動用捐項集夫開濬深廣如法并濬延壽橋
上下淤塞暨城中河道涵江河道其餘各支溝比照
南洋辦法分鄉開濬所開廢沙壓積民田殆成邱阜
知府黃署通判瑞稟蒙倡捐示諭俾令廣募成事檄
委候補同知陸我嵩至莆協同募勸將沙礫分別挑
運近海者棄海近山者買地堆積又築砌延壽橋上
八字石隄高至一丈三尺并將右邊所開之沙挑至
新築石隄之內填淵為岸以資障護此次北洋工程
在東角大工之後頗以弩末為虞而官民能仰體為
民興利至意卒使水道順軌蓄洩得宜澤垂永久延
壽八字之築尤全莆地脉攸關也

太平陂圖說

莆田廣業里諸山澗之水滙於北菽蘆溪溪之上流支
分派別節節橫截為陂至菽蘆而溪流始大宋嘉祐中
知軍劉諤相地於興教里尖山後蓮花石下設太平陂
遏支流為圳引而南注圳循山址用石砌之遇山壑斷
處作砥柱駕石船而飛渡之磴折十餘里破一小山導
之分上下二圳以石為則上七下三上圳循山二十餘
里溉林外楓嶺以下十三甲田畝下圳逐節為埧凡七
埧晝啓夜閉蓄水溉古岑九坵洪度後亭東張林外諸
鄉之田至涵口轉入吳塘設三埧蓄流上田灌溉先是

興教里有三塘曰太和曰屯前曰東塘皆唐何玉所鑿
以灌田者後漸侵沒郡人蔡襄復之及陂成而三塘皆
廢為田紹定中陂壞利廢知軍曾用虎大加脩治以垂
堅久郡人更名曰曾公陂明正統中興教里人黃道隆
復買田於吳塘涵口闢寬圳道創圭田陂分引下圳之
水西溉漏頭上洋田嘉靖時推官章彙於上圳定立二
十五石涵以田之多寡為孔之大小以杜爭競云

按太平陂環山溉田由高趨下無車灌之勞無旱潦
之患陂雖砌石為之而正流則用大木為梁細木為
柱編草欄障使南安陂得沾餘潤即遇大水漂梁亦

易於脩補惟圳道環山而行下臨深溪每致傾頽不能受水康熙二十四年里民僉呈分守道蘇昌臣給示督脩脩不如法乾隆初年吳塘與山內告爭水利七年松坂甲民蕭奕韓具呈以太平陂圳塍被水衝壞人力歧視脩砌不齊萬厯年間編為十三甲各分地界脩理人心不古水頭數甲恃得水在先不肯脩補以致水尾各鄉不敷灌溉懇請押脩等情知縣范昌治委涵江司勘詳適范以調臺事寢十三年蕭奕韓復具呈知府灝善行縣押脩立案各甲草率完事工不耐久至嘉慶年間而圳塍大壞遇旱爭水讎怨

日滋所謂二十五涵者亦不可問矣道光二年冬邑人原任知縣陳池養武舉劉世英林昇職生柯澎生員盧騰芳等具呈知府徐鑑知縣王蘭佩出示鳩工募資水頭石圳及上下吳潭要工內外兩層疊石灰漿粘做中用灰料填實堅築不使滲漏土圳則立址砌石抉去舊土用新土礮築寬厚計圳道紆迴三十里無不脩治者三年春知縣王親詣勘復錢涵涵孔改在下面以便出水灌溉既足用石掩之以灌下流之涵下劉東宮向有私開土涵二處易以石涵并定分寸以二年冬起工至四年春畢事由是水利均沾

雖遇早年其收倍焉而爭端亦永息矣

南安陂圖說

莆邑廣業里之水匯為菽蘆溪又合諸山澗之水屈曲四十里至江口為迎仙溪宋節度使陳洪進始截溪為陂作圳繞山麓東行十餘里至江口折而南注分上下二陂上陂為圳一下陂為圳二以溉待賢永豐望江三里田是名九里洋時僅草創灌溉之利尚少紹興時邑人方庭實脩築開濬規制漸備年久敗壞明正統六年知縣劉玘拆陂大加脩治并脩圳塍及陡門

國朝雍正六年乾隆十三年俱因圳塍裂壞脩砌復舊嗣因陂圳滲漏水不敷溉嘉慶十九年里人李名達具呈按田科錢脩治因人力不齊又董其事者不知水性脩不如法滲漏愈甚九里洋苦旱道光三年里人黃龍光蔡啓道等邀同邑人原任知縣陳池養呈請知府徐鑑出示并委迎仙司汪德滋督辦拆脩陂頭起舊板石掘深丈許以石攔之灰漿灌滿照舊斜蓋撞令黏合無間圳塍之壞者亦拆脩自是陂流入圳分入上中下各溝滔滔不竭數歲以來遇旱而豐甚得其利惟圳塍尚有應脩處所又陡門溝道俱宜大為脩濬并應設立水磨收利以為每年脩陂之費彼處人尚殷然也

東角鎮海隄圖說

莆邑東距海海潮自上下黃竿而入直抵木蘭陂下及各浦港南北兩洋皆築隄為防始惟洋田有隄今水埧內隄是也亦名老隄後沿海各鄉砌築埭田復為隄以障之今外隄是也遂分內隄以障清水外隄以障海潮隄有隄戶按田分配每歲夏間脩築以禦秋潮海至三江口以內流分力薄潮勢漸輕不能壞隄即有潰敗僅淹沒本埭而已惟東角遮浪二處適當東北大潮之衝東角尤甚地勢卑下無山為蔽當八月翻江九月秋濤之時潮高於田殆以丈計古有石隄以障海潮俗稱上

至木蘭陂下至東角隄皆水利關鍵處也明洪武二十一年江夏侯周德興拆石隄以築平海莆禧二城隄僅土築洪武三十年隄壞海水直至壺公山下草木皆盡永樂三年如之自是屢築屢壞終明世為莆害惟嘉靖年間知府黃一道同知譚鎧築石磯四道以殺潮勢疊石成隄以土附之人稱其功未二十年而壞餘皆苟且以延旦夕

國初民居甚少未能墾築膏腴棄為斥地雍正十三年知府蘇本潔始脩黃譚二公之迹砌築石隄內附土隄長一千一百丈障海墾田并護南洋已墾之田乾隆二年

報竣至十七十九兩年而海溢隄潰害及全洋嗣後屢有敗壞五十九年大壞晚禾絕粒莆大饑嘉慶年間鄉民乘舊址未盡壞者屈曲為隄以禦之每歲秋潮晝夜防守幸海靜波恬不至大害近年潮勢漸大內隄已廢無可守者南洋人皆以田廬淹沒為憂道光六年始議脩陂濬溝東角遮浪以隄告知府徐鑑署通判李嗣鄴知縣王廷葵會勘詳辦署通判李以憂去候官縣知縣素鴻接署是冬既開溝次年春 宮保金匱孫公 巡撫汾陽韓公以隄工緊要具奏辦理行文令仿照浙江石塘辦法為一勞永逸之謀因工力浩大委署福州海

防同知陸我嵩至莆協同地方官募勸督築以四年八月興工至次年四月石工竣計填青龍港一道築石隄一千一百十四丈底濶八尺七尺不等面濶四尺高一丈一尺有奇縱橫疊砌灰漿灌滿設東西二石涵以備宣洩知縣王廷葵復督率東角遮浪二鄉隄戶築土隄一千一百十四丈底濶三丈加隄盤二丈為五丈面濶五尺高石隄一尺又自遮浪至東角鄒曾徐交界止築水埧內隄計一千餘百丈以攔清水使由陡門入海署通判素鴻復奉 宮保籌款發辦採運亂石十一萬五千塊坦坡護隄於壳港添設石磯一道規制詳備堅久

為莆人百世之利云

按是隄關係水利民居為全莆保障功大費絀興事
時皆懼其不就卒能成此大功莆之幸也未動工時
大潮壞隄至八百餘丈委員陸我嵩會同知縣王廷
葵督夫搶築僅得平穩次年隄成而潮愈大道光十
年尤甚自福清以下沿海埭田淹沒極多南洋晏然
人皆歎頌不置云